


5563.8  
8241  
v. 7

續二

桐溪集  
七

BERKELEY  
LIBRARY  
UNIVERSITY OF  
CALIFORNIA







桐溪先生續集卷之二

傳

成石谷傳

石谷者成上舍彭年之號而頤翁其字也自少才氣  
出衆不煩提撕而嶄然見頭角中甲子司馬兩試聲  
名益以振遊學泮中泮中諸儒未能或之先也然而  
力學古文務去陳言而不襲時文體制故不利於科  
場與夫操瑟立齊門者何異晚乃收蹤反服不求聞  
達專以養親觀書爲事母夫人少有疾病則容色憔  
悴跬步不離藥餌精當修滲備至嘗作祈禱之文願



以身代辭意懇到可格神明送終之誠也情文俱到  
祭祀之忠也慤善不違與姊妹相愛怡怡人無間言  
平居非有故未嘗出入杜門端居劬揆經史百子剖  
析精微咀嚼膏腴樂而忘憂不知老之將至聰明強  
記一覽不忘博極羣書皆得其歸趣至於醫藥卜筮  
山經地誌無不涉獵而窮討焉賦性嚴毅制行峻潔  
身長骨秀神彩灑落比如鸞停而鵠峙也玉粟而山  
聳也又如清水出芙蓉而秋鷹架高樓也時俗鄙俚  
之言不發諸口委巷污賤之行不接於身非其人也  
雖與之同座不肯強意開款所謂今人與居而古人



與稽者非公之謂歟然而口不言人過絕無驕矜自尊之心故雖趨向不同而怨是用希蓋公之資稟既異而又得親炙於葛川林先生之門澡身浴德文之以孝弟之行養之以冲澹之趣者豈無所自而然哉於詩用力專久尤長於排律雄渾清高如其爲人筆法遒勁得於右軍者爲多每遇勝日有好懷負手松陰之下濯纓巖流之上吟哦古詩氣調清壯若非塵世中物也倚醉賦詩水涵山出乘興落筆風飛雨走浩浩高歌林木欲動蹲蹲慢舞有如老鶴翩翩倚雲霄也噫如公者可謂間氣人也以其才則足以笙鏞



乎治道以其志則可以激濁而揚清金藏玉隱未爲造物者所識終爲澤而不爲川惜也然而公之所以自樂於心者不以是而有所加損焉則豈可以自外至者爲公之得失哉蘊年未弱冠出入門庭親承擊蒙之誨每聽其講說之旨則如客之得歸也如寐者之得叫喚而覺也如迷道者之得坦路也蘊之得有今日公之力蓋多焉公之著述遺失殆盡進不得有爲於時退無以垂言於後余懼其泯泯無所傳敢記其所聞見庶使後之人聞風而興起云爾公昌寧人生於嘉靖庚子卒於萬曆甲午有子三人皆業儒能



世其家云

趙孤山傳

先君子選於鄉得友數三人孤山趙公則其一也公之事親居喪皆在蘊未省事之前雖知其必有可稱之實而不可以臆說形容之第聞公之遭母喪先君子亦在憂中聞公毀幾滅性貽書勸食羹菜公見其書曰此友有言何敢不從卽進糲羹賴以得甦以此觀之公過哀致毀之誠友朋相信之篤槩可想見矣且以吾所觀於公者言之其性溫而剛其氣和而直聽其言侃侃乎其辨也觀其貌勿勿乎其信也舉止



閒雅襟韻疏暢涇渭不渾是非得正好惡不差善惡  
自別明事理多才幹常曰吾濟輩中若責以臨民治  
事之任則吾不讓於人人亦許其自知之明焉宅心  
平易而不艱險接物坦夷而無藩籬一弟一妹友愛  
篤至與朋友交信而有義常與先君子終日相對未  
嘗以慢辭褻語相侵加真所謂久而能敬者也雅有  
高趣窮山討水動與先君子偕焉每遇佳處逍遙忘  
返若將遺世者然時會溪堂連枕而卧明月滿溪清  
風入戶公乘興發歌音韻鏗鏘若出金石能使人發  
感歎孤山之下臨流築小亭與嶧陽杏亭相望公沒



之後先君子有詩云山下亭通水上亭時時相望暗  
傳情如今無復水亭望獨立山亭霍涕零生前相愛  
之情死後追悼之懷此一詩盡之矣公之喪適值飢  
饉之餘人失恒心不知吊哭之爲義於其葬也鄰戚  
鄉友無一人往見者獨先君子臨穴哭之慟一死一  
生乃知交情者非耶蘊雖藐然一後生公常器重之  
因事稱許者不一而足追思至今言若在耳顧無以  
承當期望之意而反傷藻鑑之明可歎也已公諱孝  
博字行源長先君子一年得年五十七縣監朴公惺  
嶺中高士也一見公知其爲有道卽許以知心之友



常以不能救公之死爲平生大恨云

柳申溪傳

公姓柳諱世漢字大源爲人溫厚慈良拙於營爲平生無忿厲之色鄙悖之言善書法筆畫活動適健尤工草隸運筆神速風飛雨驟莫測其端倪當其時蘊無所見識不知其書之爲珍貴到今思之恨不能多受真筆以爲寶玩也宅邊有溪發源於金猿山下公構堂其上扁曰申溪亭着道冠被麻衣日靜處乎其中起居無時惟適之安或坐茂樹或濯清泉以自樂其於一切世味泊如也晚得中風症言語不通沉綿



數歲而卒噫公自早歲習舉子業雖捷鄉解竟屈南宮有此筆法之奇而不見知於人家無幹盡之託遺業爲他姓所有惜夫

昔柳子厚作先友記錄其姓名與其實跡以明其父取友端余之立三傳亦此意也先君子於鄉人相與爲友者固多而終始莫逆則在此三公者矣故謹述其言行梗槩并錄於先君子行狀之後或曰三傳所記詳略不同何歟曰人之行跡固有可記與不必記者而吾所聞見亦不容不異焉余於石谷出入受業故竊窺其門墻而得其詳孤山雖



未有受業之益而得於觀感者爲多至於申溪則其行事之實有不可得而聞者雖欲不略得乎雖然略者固可憾矣詳者亦必未詳也後之覽者各以所知增益之庶乎其無欠闕矣戊午春三月初吉書于栴棘中

八溪鄭希周傳

余有賢侄曰昌世者希周其字也生而穎悟先君將出外失靴所在求不得希周以手指之就求始得之蓋程伯子指釵之年也先君甚以爲奇年五時已入學迎刃而解不煩提撕九歲失所恃悲毀如成人過



再菽不食肉者又三年先君慮其羸弱致傷多般泣  
勸始食之誠孝之得於天者如此性拙而靜不喜嬉  
遊言寡而謹不發躁妄行恭而方不見麤鄙氣清貌  
秀望之如玉潔冰清自始學至大成耽嗜書籍注意  
鑽刻不待榎楚之威而能如葛藟之悅口幽居靜處  
兀然對卷手披口吟欲罷不能雖在芬華波蕩之中  
亦不爲間冗之談蓋其性然也以此文詞日益進大  
有聲於世年任戴冠累捷發解再魁都會一時儕輩  
之以文鳴者皆自以不及居家醇醇執子弟禮惟謹  
言無慢色無忤上自大父母下至諸父事之如一人



無間言其與友交若婦女而端重自飾不設戲慢之容故人愛而不敢侮焉聰明過人凡一經於耳目者輒不忘博覽經史洞達古今與余從事舉場屢矣考官出題改易頻數而皆知其所自出問之應口對無疑老生宿儒皆服其聰敏歲在戊申春隨余上洛將觀國光適值鄭相國之疏朝議汭汭禍將叵測門生之欲爲伸救者恟於克炤懷疏至闕下旋欲散去希周毅然折之曰到此還散必爲藉口之資何忍爲此諸畏恟者不獲已勉從士論賴以不敗平居體不勝衣而臨事剛凌截然不可犯者類如此噫使汝達而



行世則必不違道竊而在下則必不失義才高不少  
試行不顯於世而鵬程未風蕙質先摧時耶命耶造  
物者爲之耶汝稟質殘弱劬書過苦得病蓋由於此  
數歲沉綿之餘猶不忍釋卷叔父訶禁乃止屬續之  
日精神益茂言語不錯斥去妻兒使親故扶持悠然  
而逝平生定力到此可知老夫於汝名雖叔侄情實  
父子其於儒業汝早我晚動必相隨筆硯與之同凡  
古今得失人物賢否暨當今之事可是可非者必相  
與商確質問要之有歸宿而止焉非但叔不得以侄  
之反有質於汝者居多焉粵自庚戌以後誤出仕路



在家日少汝死也汝葬也初暮也再暮也皆不得哭  
焉聞汝將死念我不置慘慘語在口不絕汝能父我  
我不能子汝明幽兩間負此良侄嗚呼痛哉家兄嘗  
謂余曰吾子有才行而未達且未壽將泯泯無所傳  
汝其一言以圖不朽余承命久矣第以放筆有日文  
鋒已澁常期投綬丐閒復理舊所讀庶不負愛之斯  
錄之義矣不意事與心違今爲窮途之囚常恐一朝  
溘然終孤家兄之望故援筆而錄其槩希周之死在  
萬曆辛亥距生之年二十七歲無嗣子只有二女噫  
天之窮汝一何至此哉



鄭義士傳

義士諱庸名雖武人常有士君子志操壬辰亂時以老未有所屬聞金沔起兵慷慨言當此急難雖老豈可退坐赴沔陣中沔義之常置左右與謀軍事其信重加於參謀士子每接戰時戒之曰子老矣慎勿赴敵庸不聽常突擊先登勇出諸軍沔常稱之曰忠義人也條其功勞聞于朝乃差爲聞慶假倅庸力辭曰吾武人討敵是其任字牧非所能竟不就職沔益重之及沔卒歸兵使崔慶會當晉州守城時慶會憐其老解使歸家庸以臨亂退去爲不義區處家事與



家人相設竟死城中

記

鄉射堂重修記

萬曆乙卯春鄉友吳君而泳以書抵海中曰鄉堂始克重建子其記之余僇人也何敢以文字接於人既而私自解曰一鄉私也非公也吳君遠有請其可以辭古者以萬二千五百家爲一鄉鄉有長以旌善禁慝焉卽今之鄉有司也上以耳目邑宰下以糾正民風得其人則官無事民不病不得其人則官以之凋民以之瘵其爲任厥惟艱哉是以列邑重其選名其



所處之堂曰鄉射蓋取古人飲射之義也吾鄉舊有堂在東閣之東光風樓之下其制甚備粵在丁酉兵火夷之假設草舍於舊址之西百許步架漏度日且有年紀堂階不尊出入無防鄉風衰替故老咨嗟今有司娥林劉君信甲首陽吳君德湓八溪鄭君仁慶慨然相與謀曰前之爲任者視此堂如傳舍莫肯用意經營吾儕因循又不圖罰其可逃議以克合乃就新卜鳩材舉役維月同日工告訖功間架之數制作之形雖不可遙度水泐泐循除鳴山兀兀右擁左翼者則可以神會而得之向之不尊者儼然無防者截



然飲射讀法慶老講信優優乎其有容焉三君用心  
斯亦勤矣既又以一言遠于諗之曰任無大小鄉國  
一體鄉之積者爲國任之小而可大未有能任於鄉  
而不能任於國者矣如使爲是任者不失其身勵其  
清白公正之心戒其貪污諛佞之習則上有所憚下  
有所畏行乎鄉里綽有餘裕舉而措之何往而不自  
得哉不然惟身之利是圖其不爲鄉里之賤棄也幾  
希矣三君蓋鄉之望也其能爲前之爲而不爲後之  
可羞者審矣倘以此語揭諸壁間使後之繼入斯堂  
者得以觀省於無窮焉則不亦幸乎是歲首夏之初



吉

序

大靜縣官案序

縣之爲縣迄今數百年矣先生案之作始見於今日何歟曰非作於今日也蓋自古傳來者久焉而今侯特因而修改之耳述之云耳豈曰作之云乎曰然前所謂案者非公案乃下吏私記也書姓名則只取音同而不辨真僞記年月則前後乖舛而無所取徵麁紙胡書固不足道也會何案之有哉侯之爲政于今三年政清恩行百廢俱興乃取此錄易而新之字之



訛者改之時之舛者正之遺焉而補之略焉而詳之  
鮮粧而責其外精寫而侈其內展而觀之宛然一案  
史也如斯然後方可謂之先生案而人雖曰不作吾  
必謂之作矣嗚呼自俞侯至成侯凡八十餘人而賢  
愚善惡不能掩於流傳之口耳故按案指點者莫不  
曰某也仁某也暴某也清某也污而寄褒貶於無窮  
則登名于案者其不惕然於中乎使後之繼今者能  
以仁者爲法而暴者爲戒清者爲師而污者爲懼則  
先生案之作夫豈徒哉而成侯之惠此邦不止於一  
時而已斯可志也已未春二月丙寅



西澗小樓題詠序

右七言小詩二十八首乃西澗所唱而諸賢所和也  
西澗鑿方塘構小堂既成而斗酒熟矣以詩三篇走  
猿鶴邀佳賓而落之綠樹濃陰清流有聲山雲一帶  
時往來于其間矣酒半酣各抽悶思吟成三絕大抵  
皆述西澗之志也嗚呼詩者所以言志也詩而不能  
言志則雖有雕篆之工月露之華亦奚足觀哉三百  
之篇曾經造化之筆而閭巷間鄙俚淫穢之詞皆存  
而不刪者非取其性情之正也乃取其言志也蓋人  
莫不有其志有志而達於言辭者鮮矣况詩者言之



精也。比之言辭難易百倍。而把筆一吟。能使心意了然。於手下而觀之者。亦莫不知其志之所在。詩至於此。無復加矣。今觀諸篇。雖不無工拙之可言。而皆卽其所見。述其所懷。新堂風致。形容妙矣。西澗趣味。發明盡矣。若使此詩行於世。則雖不登此堂。而可以領得其爲形。雖不見西澗。而可以想見其爲人矣。然則詩之不可無而亦不可易視也。如是夫。噫。士之生斯世也。豈若匏瓜也。然哉。出而兼濟。乃其志也。而懷道抱學。守屈窮閭者。有如西澗。則豈非吾徒之所當慨歎者也。惜乎諸賢之言。志而不一及之也。余旣步其



韻又從而序之

祭文

祭李希雍文

嗚呼哀哉行修而備人孝出悌肥家之方祭敬喪哀  
奉先之節推誠接物削去畦畛凡愛親仁樂道人善  
身安義命慕絕利榮以余觀公未學未信將期仁壽  
公則有之一疾沉綿云胡不淑鄉無善士巷無居人  
若予鈍愚早被知許通家相好情若天倫薄宦年來  
會合亦濶當公病革余客于京千里承凶數聲嗚咽  
日月流邁已卜新岡術忌之拘又未執紼兩負生死



淡愧幽明今宵屋樑最是寒月如何勿慟一別千秋  
不昧者存庶歆情酌

祭文剛哉必陽文

惟靈停鸞之姿美玉其質趨庭有間斬然頭角溫恭  
端雅克肖厥德將期奮迅以振家聲如何鳳兒未飛  
摧翎善無餘慶仁不必壽高堂景暮黃口猶覲舍而  
不顧君何忍微老夫於世閱人不多心誠愛重在君  
靡他君亦不鄙屢枉窮谷猥托先誌未始不諾衰懶  
遲延奄遭鉅創幽明之間負此重望當聞君訃慙制  
未闕迨夫卽幽又值祭吉歛未摩棺窆不臨穴挽歌



之索搆草未及雖緣牽掣愧負平昔日月如流祥期  
再迫最晚一哭代以豚犬聲借情真庶歆薄奠

行狀

松圃李公行狀

公姓李氏諱逸老字晦叟號松圃陝川人新羅開國  
功臣謁平後有諱敢麗朝官獻納舍人寶文閣直提  
學昇平伯麗訖改名致入杜門洞我朝屢徵掌令  
奉國贊成事不起寔公六世祖也曾祖諱繼長贈  
兵曹判書祖諱世琳大司諫考諱敦贈參議妣夫  
人全州柳氏縣監灝女淑美貞慤萬曆戊寅公生生



而異凡庚子與弟逸彥連壁司馬自少有個儻奇偉之志每當古人忠義處則未嘗不三復發歎興慕事親盡其職處兄弟友愛眠食不相離以節義相勉勵日事吟哦與姜睡隱權石洲諸公迭相推許唱酬詩集多矣當光海癸丑進士偉卿掌令造訶倡發克論公發憤曰藝倫數矣 宗社亡矣我祖宗數百年士氣正謂今日也夫春秋之義君讐國賊人得而誅之則我輩生亦何爲謂伯氏夷山公曰親老在堂兄室終養弟當不敢有其身而爲國討賊則吾兄弟各全忠孝不亦可乎夷山公喟然歎曰當仁不讓雖有聖



訓賢弟之言若此豈無感於心乎爾其勉之公乃身  
冒萬死持斧詣闕抗陳危疏極請討克克徒鼎沸固  
請重辟公終無危懼之心益切忠愍之志卽遭黑山  
島桤棘行至謫所因賦行錄詠懷百四韻詩以寓憂  
國戀君之衷也其詩略曰白首客京華青衫困一方  
直道愧非柳二黜移星霜一念懸君親眼穿三角  
山忠孝百年心蹉跎向誰說其餘詳載詩集每吟頻  
登望北樓之句以寓懷也癸亥 仁廟改玉公宥還  
除 宗廟奉事逮丙子虜變公以分朝陪 廟杜主  
八心都與金仙源李竹窓李東川諸公辛勤顛沛忘



身扶護夷山公携家眷同入一瞥之間虜騎搶掠人  
皆鼠竄龜縮望風偷生時姻親李俊培艤船而謂公  
兄弟曰事已急矣卽上吾船相與圖生公嚴斥曰今  
日臣子何忍出此言耶國步艱難生將安歸死亦難  
瞑主辱臣死義也男女同船非禮也顧謂夷山公曰  
吾以世祿之臣一死報國是其職耳况忠孝二字吾  
家所傳而泰山鴻毛孰輕孰重同事守臣鄭孝誠尹  
烱洪命亨金益謙柳順長諸公相對涕泣曰明公雖  
得萬古今名將置一宗社於何地也公卽拔佩刀斫  
指血書一絕曰北虜渡江勢已深守臣何面覩何心



美人消息憑誰問。劍上飛魂可往尋。卽自引松亭浦  
其夫人趙氏亦曰情同百年義共一死。夫死於國。妾  
死於夫。潔身同歸。實所甘心。其伯氏夷山公與兄嫂  
朴氏同時以從。乃丁丑正月二十三日也。其夏五月  
守臣尹履之狀。聞贈司憲府持平事載尊周錄公  
之子星后泣血曰。孤之父兄弟節義有不可湮沒。踵  
余門而求余以拙辭謹據行錄而略叙以待後之君  
子。贊曰。漢山蒼蒼。漢水洋洋。名與之高聲。與之長聯。  
芳并美節。義成四嗟。公一門流慶千禩。

墓碣



陶村曹公墓碣銘

并序

天啓四年十二月甲子通訓大夫大丘都護府使曹公以疾終于家後十年其配淑人李氏亦歿其孤挺立累然服喪來問銘於八溪鄭蘊蘊幸得交父子間不敢辭公諱應仁字善伯號陶村其先昌寧人自新羅遠有代序八高麗有諱謙尚太祖女德宮公主寔爲鼻祖厥後聯拜平章者八世至我朝益蕃昌代有聞人有諱繼衡官戶曹參判是公之曾祖是生諱彥弘校尉是生諱夢吉贈承旨承旨娶平山申氏卽高麗壯節公崇謙之後故徵士松溪先生諱李誠



之女松溪與南冥曹先生植黃江李先生希顏爲道  
義交世謂嶺中三高以嘉靖丙辰五月十六日生公  
于陝川之心妙村年在韶甌氣度已成承旨公卽世  
尚幼也其戚容哀號有非童子所能者吊者異之後  
丁母夫人憂廬墓終喪葬祭皆以禮士友稱之始從  
姊婿金公聃壽學仍得謁寒岡鄭先生先生一見知  
其爲善士授大學章句卒業而歸其所與交皆一時  
名流由是學益明文益進尤長於史學其於古今治  
亂人物出處了了如眼前事以餘力事舉子業累捷  
發解竟屈南宮遂收蹤不復應中身也姊妹宗姻之



子有孤而失學者收教之有貧不能媾者助之資內  
外親無疎近因亂流漂者皆家歸之全活甚多焉已  
亥初授尚衣院別提不赴丁未又拜 王子師傳遂  
就職教三 王子 宣廟賓天解歸且三年旋拜瓦  
署別提后滿陞拜工曹佐郎俄移司僕寺主簿僅閱  
月出守山陰縣未幾以事去官壬子又起令龍潭縣  
奉公臨民一以誠信居四載治常爲最乙卯陞拜溫  
陽郡守治之如龍縣之爲而介厲加焉時諸宮家奪  
民田之弊遍國中有稱東宮人者羣數百入其境攘  
占甚廣公乃捕繫之仍馳書與宮僚曰我臣民戴



東宮仁聞久矣今也縱私人奪民田諸公職輔導其  
不能救歎宮僚乃進書于書筵卽下令辜其人還  
其田溫民得免其害始溫俗有校生外士之別守聖  
廟執籩豆者皆耒耜之子名外士者皆奴視之足跡  
未嘗入校門公慨然曰是何等弊習也吾必有以導  
之每當春秋釋菜必躬親行之不懈益虔諸生駸奔  
宿弊丕變由是又進鼓拜大丘府使府在營下責應  
多門號令煩劇公處之優閒革弊蘇殘非一二數居  
無何適會鄭造按道公卽有去志而已被其齟齬乃  
以事誣啓拘王獄半年事得解自此歸卧田廬益



無意於世卒以此終年六十有九公爲人性行純美  
氣貌清和樂道人之善如自己出行已接物務以忠  
厚爲心與人語怡怡若無所不可而至見其非誤則  
峻辭以責之故人皆畏而愛之見其鄭仁弘行事不  
正萬端矯揉欲納無過之地先知爾瞻之奸言其當  
絕而終不能動其聽迨其末年遭國家倫紀之變做  
得大狼狽公遂斂跡而退投書而絕然其被逮受戮  
也公爲之哭賻不廢平生之義公之所存益可見矣  
公娶全義李氏高麗太師諱棹之後也曾祖諱昌胤  
掌令祖諱公輔縣監考諱得簣軍資監正監正娶江



陽李氏節度使允儉之孫判官希顏之女是所謂黃  
江先生者也淑人生長法門德行淑嘉奉姑孝事夫  
順有倫五人俱先歿以先隧無碣爲平生恨募工豎  
石費皆出已每當忌辰節祀備物別奠歲以爲常歿  
於崇禎癸酉九月六日距生之年七十七歲葬于吾  
道山東麓西坐叩向之原與公同兆而異域公有子  
男三人女二人長曰挺立掌令次曰挺生文科正言  
次曰挺英武科宣傳官女長適監察尹時男次適士  
人尹正辟挺立有子女十人長曰時亮生貢次曰時  
胤長女嫁爲宣傳官李敏發妻次嫁爲士人李璫妻



其次幼挺生有子女七人長曰時逸文科佐郎次曰  
時遠時達皆幼長女適士人權克履餘皆幼挺英早  
死無嗣尹時男亦無后尹正辟有子女四人長曰喜  
次曰志女適士人權克頤次幼內外孫若曾男女凡  
三十人嗚呼公承世族之後又積善于躬及公之存  
子孫多已顯且其衆多如此蓋必發其在於斯乎是  
爲之銘銘曰惟公之系遠自羅世入麗尤大九代平  
章至我 國朝厥聲彌昌其遷于南自公皇考世德  
之蓄公應其報公生而異幼能哀喪早從師友詩禮  
之場 宣廟嘉乃俾傳三子開迪有方孱挾處事入



翔郎署出宰郡邑在所治著頌石屹立遭時險熾獨  
脫危機謂享遐筭胡至於斯惟其子孫既衆且顯仁  
後之理可證非舛有如不信考此銘撰

奉直郎全公墓碣銘

公姓全諱轍字子由四樂亭其號也貫旌善高麗太  
師忠烈公諱以甲之後中世有聞人有諱曰遇和提  
學曰賁參贊曰五倫判書公號採薇諱守恭通政大  
夫寔公之考祖諱由義陰縣監曾祖諱孟謙陰郡守  
公生於成化十七年辛丑正月二十一日卒於嘉靖  
三十七年戊午二月十五日享年七十八以是年十



月十二日窆于金寺山辛坐之原配恭人鄭氏副司  
勇純女亦晉陽大姓版圖判書仁得之六世孫也生  
二男長士英次士雄士英娶忠義衛鄭成璉女生二  
男三女長曰琮內禁衛 贈工曹參議次曰瑛琮有  
一男一女時望也徐恒也瑛有一男一女時若也呂  
光立也女長適李杵生三男一女男應薰應蘭應蕙  
也女李春秀也次女適李應真生一男一女忠卿其  
男也曹崑壽其女也次女適部將李承後生二男一  
女長峴參奉次暉女判官李順楨士雄 贈通政大  
夫刑曹參議娶參奉盧祐女生四男曰珩曰瑀曰琚



曰璜一女金復慶珩通政其子曰時暘直長女察訪  
鄭惟悅瑀之子曰時旭琚有三男一女皆幼璜直長  
有一女同知鄭賀男其婿復慶之子曰瑛曾玄孫內  
外男女無慮三十餘人何其盛歟公之孫珩將圖堅  
石錄示行蹟曰公孝友於家睦于鄰里以今子孫之  
衆多想見公之德則斯言信矣是爲銘曰鬱鬱松栢  
金山之麓負陰抱陽我公之宅振振後昆餘慶之發  
一片斯石不朽之跡

附錄

輓詩

趙綱



西戎恣虎吞周室日以微王帛走咸陽諸侯安敢  
違燕齊既屈伏邯鄲又被圍辯士結其舌俠客約  
於威魯連何爲者獨覺帝秦非匹士輕一羽蹈海  
誰汝哀其言雖若愚其義動九垓夫子作春秋攘  
夷力大哉此人知此道千載嶽崔嵬我把魯連篇  
遙輓桐溪老後人知不知灑血向蒼昊

又

李溟

鮮立看千仞平生直道行忘身扶社稷瀝血犯雷  
霆竄逐三危險彝倫萬古明何神不救護惟帝鑑  
忠誠蔚啓亨嘉會優承拔擢榮蒼黃扈大駕懷



慨守孤城 主辱息臣死時危覺命輕踈慵元寡  
合肝膽獨相傾半世同心跡窮途若弟兄范張溪  
結契李杜愧齊名奄隔人間面將期地下迎東韓  
收正氣北漠振風聲却憶升堂拜應多托後情腰  
間佩刀在無復贈離亭

又

姜大遂

光嶽扶輿氣於人鍾我公洪濤砥柱立瀛海客途  
窮宇宙氛乃豁君臣契更融危言動紫極直道聲  
丹衷逆境遭何屢孤忠事可恫從容蹈白刃肝膽  
質蒼穹舍去方知學全歸未愧終嗟賢蛇在歲瘁



國鳳藏空斗轉河斜夜山高水遠風清溪映淚睫  
扶鼎古今桐

又

劉敬甲

先生生南紀三朝德業崇功高扶社稷道合契昭  
融正議排霜雪危言動華戎平生無愧怍千載作  
師宗

又

姜濬

先生天下士節義凌松篁雙眸轉秋水神彩映朝  
陽結髮學古道上君白玉堂東朝見廢日諫疏  
挾飛霜蛟鰐垂涎地性命輕一羽甘心色不動正



氣橫秋宇中興忽鼎革新詔飛海棘歸來 聖明  
朝凜凜秋一鷄平生寸心赤補天鍊五色旄頭踏  
漢月鍊鳳問丹極珠玉走毳幕紛紛爭帝秦孤城  
氣淒愴八彩帶腥塵先生揮雪涕獨立憤忠烈封  
章借一戰復見麟史筆魯連蹈海後高風今尚存  
某里數墨山環作周乾坤東韓三百年藝倫賴不  
滅周斗未云酌秦眷遽爾輟樑摧大厦傾鰲去三  
山沒斯文失所依牢落吾安做堂堂寧復有痛哭  
埋黃壤

又

徐翮



相溪先生集卷之二  
隱麟德裕山揭然國之望天覆地又載知功大且  
壯有似魯仲連蹲蹲蹈海狀青嶂出雲中澹庵與  
相尚嗚呼天不吊山頽人誰仰

又

李壽櫬

曾於皇考許心知小子承顏復幾時百歲自期依  
泰嶽一朝誰料失蒼龜忠言直節人爭仰正學奇  
功世莫窺瞻拜德容難再得臨風非獨哭吾私

又

林真忍

純剛正氣鍾先生鐵石肝腸雪月精家世孝慈曾  
盡性淵源詩禮早趨庭綱常日炳耽溟濶節義霜



嚴漢宙橫筭了古今天下士曾連何獨擅高名

又

禹汝楸

白鷄殘夢去年酣忽忽人間七十三氣作山河壯  
西北名爭日月滿東南鄭玄儀禮家兒在唐介疏  
章國史談豈獨儒林紛雨泣天添朔雪灑猿潭

又

鄭以道

身繫安危數十齡莊嚴風彩動朝廷格言凜凜人  
爭服正論堂堂世共驚萬古綱常光竹帛半生行  
止質神明可憐一片孤山土埋却忠賢未死精

又

曹時亮



曾捫北斗樹旌旗孝悌忠誠兩得之東國先生今  
在此西州豪傑復從誰中天日月高明潔大地山  
河正氣微莫道音容泉下隔雪中猶待歲寒姿

又

李 崧

德裕山高釀靈異鍾精淑氣生氤氲葛川澤陽水  
南北一脈來自春風溫就中桐溪大君子星斗于  
天吾道南鳳雛驥子生有種可見青出青於藍往  
者許國登臺省風力正摧千人軍麟膠鳳觜殿陛  
上大計要須堯舜君直道不容小朝廷路指鬼門  
幽且復烏誠天末白雲思葵向危樓北宸迥生民



塗炭十年餘曆數傾否歸神聖窮溟驚蟄雨露新  
五采丹鵲雲間飛明辰遭遇母子同忠孝君親家  
國而蘇仙風采襯玉色賈生文藻映當時平生忠  
直舌不柔一代瞻聆咸畏忌邦家三百正倫紀天  
地神人合感喜國運不幸歲丙子痛哭箕封棄禮  
義君臣揮淚宋南渡全蜀臨危誰北地老奸賣國  
眩國是屈辱王靈今若是抗章瀝血能幾人一榻  
庭中惟一二孔訓殺身曾已皮逢死都緣天悔悟  
金猿山前鶴洞裏蹈海清風繼千古櫪馬俄驚巷  
有哭菴不相杵蜀婦髻孤忠大節宇宙間正氣綱



常應不磨我來三斗崇禎年坐對泉中鐵鉞明靜  
想儀形不可覩瞻仰但覺長虹精悲來乎魯連文  
山未死心結爲雷霆天外鳴

又

李應白

皇降斯賢豈偶然三韓正氣賴延綿尺章萬古扶  
倫紀寸刃孤城聳列貞大義高名懸北斗貞忠偉  
節照南天虹橋彩滅將安仰忍淚長吟魯連篇

又

劉希道

德裕山佳秀猿溪水麗奇天將降大任公乃起南  
陞付畀斯爲重沉潜不自疲文章山韞彩儀表玉



無玼鴻寶寧全秘丹梯早追隨方冠試越用珍髦  
鬻戎資燕石珠方渾齊竽瑟不空天網將墮地人  
紀孰扶持呌閣秋霜烈封章白日垂薰猶難可合  
冰炭竟相違貝錦無停織朱絃有斷絲形容枯海  
曲歲月暮湘纍天道由來復風雲亦有時委蛇嘆  
舌地沐浴鳳凰池禁液經綸手銀臺補衮忠專城  
初製錦方面又褰帷寵渥宣闈溢榮光泉路遺宸  
情雖密勿賢路亦嶮崎爰立人將倚調梅世莫知  
焚藁志未浚孔棘事纏罹宣父辭邠土旄頭俯漢  
澹乾坤嗟已矣孺葛竟何爲澹庵章雖切東窓日



奈虧尊周事大謬蹈海跡愈危立脚其如許斯文  
舍此誰入山遺世事披髮對軒義幾灑傷時淚猶  
多戀闕悲儒林方倚斗廊廟已無著勲業銘諸鼎  
篇章賁幾碑非徒邦國痛深自哭吾私

祭文

安義鄉校祭文

鄉人劉弘甲林真龔鄭昌弼  
慶榮男林真惠慎景稷劉邦

龍鄭師古  
林汝捷

嗚呼哀哉一氣磅礴萬古長存地維以立天柱以  
尊此氣之直先生得之此氣之正先生養之初無  
限量可塞天地亦既襯貼曰此道義確乎不拔義



易金矢勿欺而犯魯論如矢袖中何有綱常一筆  
霜生血疏鬼泣壯烈投荒職分鼎鑊飴蜜輕似葉  
身重於山名天涯地角素位而行平地坎窞終始  
一節時事干戈熊掌我欲胡銓之心縱不求活秀  
實之笏只自開直一病緣憂某里雲壑牀頭五經  
食前三韭名利付苓是非添嘔身三卦居心千古  
上卽之也溫儼然人望蓋斗南一無國士雙昔我  
安縣今爲鄭鄉爭覩人瑞有所矜式謂室仁賢五  
福一曰龍蛇一夢奄此起起眼前今古飄花逝水  
儒林不辜邦國殄瘁念我鄉人若老若稚環顧其



中雖極俛俛受教多年庶可知方今其已矣天道  
寧論一哭吾私有淚翻盆然我先生與道逍遙爲  
山爲河以壯 本朝爲日爲星洋溢 中國顧余  
蒙學亦將何托醴齊炙鷄敢此合奠物薄誠深庶  
幾歆焉

龍門書院祭文

院生姜紙鄭又玄趙大德慎  
識慎諱林真忍郭希益林汝

祥全  
孝明

嗚呼慟哉粵惟天地一氣純剛磅礴兩間萬古不  
亡千逢骨朽此氣則常公挺東陸得之堂堂勿欺  
而犯所操者方值昏之朝而辟無良公乃辟立扶



國大綱睹彼鬼域莫干其傍長宵日月節薄霜天  
松篁匪勁金石匪堅干戈之厄岌岌丙丁天狗蜥  
堞霧毒風腥主辱當死實見得是邪議雖叟在公  
無愧公賁于趾曰某其里西山矗矗東海洋洋公  
憤于世脫屣斯壯殄瘁之慟下同胥臺嗚呼哀哉  
山嶽在地星斗在天萬世在後百世在前公出不  
再不息者氣世道求賴罔墜於地嗚呼生等夙承  
警咳咸仰門牆樑摧安倣雨淚之湧有矢于前有  
薄蕉黃許紆一歆千古心香

濫溪書院祭文

院主梁棟姜  
有徵林震逸



河嶽之靈金壁之珍應期篤生國有蓋臣有道無  
道如矢其操一扶彝倫十暑孤島遭逢清化

王曰遄歸出入臺府不忘君違時危志烈丹悃彌  
固主辱臣死白刃可蹈煌煌大節質神無愧長我  
儒宮式我士類不行阿好迺公素畜唇舌何紛擠  
不遺力公爲不聞獨與道遊庶保松筠送老林邱  
天胡不憖櫪馬俄驚身騎箕尾氣結雷霆著龜忽  
喪稽疑何憑棟樑遽摧支厦誰能憂世之志致君  
之節戢于一木吾其披髮顧我諸生早陪杖舄不  
我愚賤左提右誘沐公恩波冀公遐壽纔踰七旬



豈云稱德慟纏斯文誰扶誰植悲淡蒙學孰依孰  
恃瑞世異表匡時重器一擲玄牝厚夜難曙柳車  
載肅不留不處一杯雙淚九原千秋靈其屑歆誠  
以爲羞

誠信契祭文

契負慎諱  
劉弘甲

嗚呼哀哉精金美璞不見其瑕者先生之器也霜  
鵲獨擊貞松拂雪壁立屹屹植脚不動於頽波萬  
仞之壑者先生之節也軟鍊石腸排折檻手貫日  
月撼海嶽而栢臺千秋秋霜烈烈者先生之筆也  
則此莫非先生之學有所本而有所養也蓋百世



不再出兮伊一生難再得則其亡也不慙之慙云  
亡之歎上自宸極下及臺胥矧惟同鄉黨簿金  
蘭而荷顧盼奉下風於衣塵几席之側者安得不  
哭之慙而懷之緇也雖然先生之扶植綱常使之  
國有今日者炳若日星之在乎天也久而愈明其  
氣節有不與死生而存亡者則其又何悲然則生  
等之所以噉噉然聲發而涕隨者特出於私也敬  
奠一瓣蕉荔矢前心香徹幽想紆歆止

士林祭文

趙綱

於乎天地之間至大至剛之氣亘古今而不漓然



而人之生也得之者蓋寡其或得之而以直養而  
無害者尤寡若先生可謂得至大至剛之氣者非  
耶爰自結髮讀詩書六藝之文信道之篤白紛如  
也則謂之以直養而無害者卽宜逞萬曆之癸丑  
君昏於上柄倒於下惟以閑東朝賊倭夫爲祛患  
保國之至計當時之立于朝者雖素稱骨鯁無不  
畏其克焰戰掉悼慄咋舌而辟之先生獨奮筆草  
疏累百言蹇蹇諤諤若赤手撓虎之牙批龍之逆  
鱗糜身粉骨曾莫之顧而忠勇不衰若盧半載不  
足動先生一髮海棘十霜不足頓先生一睂此則



剛大之氣見乎危亂之邦者也暨遭遇聖明年  
考已大髮種種而皤皤空其埋獄之劍少頓干斗  
歷塊之驥欲飲餘足當官不避遇事輒發視疇昔  
有加而凜凜風立臺閣淮南之遷漢廟之議無終  
之和廷議紛拏顛倒是非先生一言之柱人皆動  
魄此則剛大之氣見於清明之朝者也翟爲封豕  
長蛇荐食我國魚鱗雜襲於廣南之下外無溫太  
真之投袂內無董安于之治公宮廟堂之所籌畫  
惟欲石晉我君父靖康我社稷先生之背城  
借一宵攻王舍之策於是乎外焉而不以爲忠



寸膠不能清橫流之文渾一木不能支大廈之傾  
頽固也車右刎首鄰臣伏劍烈烈皎日乎先生之  
腦此則剛大之氣見乎顛沛之日者也古語曰君  
父至尊親也送其終也有時而旣自丙子至于今  
凡幾年所卿大夫安於朝士庶人安於野商賈安  
於市舉皆媮衣甘食而嬉娛胡先生離兄弟孀妻  
子塊獨處乎窮山之中惡衣糲食冬夏而朝夕以  
糲糊斗血不能卽瞑於圍城爲負罪引慝不敢忘  
於須臾此則千百載先生而已矣古之人三十年  
終於車上者奚遽不能與之爲徒此則剛大之氣



見乎委靡之時者也嘻歲自始至卒其氣之七十  
餘年充塞宇宙不爲威惕不爲利屈成敗利鈍險  
阻艱難不少挫焉則其肩與萬物之有生有死者  
同歸於盡乎然則先生之卒也吾知栢楸不能斂  
其魄重泉不能掩其氣歸之於太空之冥冥其或  
爲雷爲霆爲豐隆爲屬翳而洩其憤則神州赤縣  
四方萬里之內淨掃犬羊之羶腥其或揚光彩炳  
烺長夜則厠近紫微垣天元帝座爲輔弼之星孰  
謂先生今也則亡所不見者崢嶸嶺宇抑抑威儀  
而其不亡者與宇宙長存吾故不爲世俗吊死之



哀以謀先生叙此剛大之氣以爲言先生其不一  
噓於白天之門耶

又

許穆

嗚呼有至大至剛之氣寓於無形塞乎無垠升而  
爲天沉而爲淵明則有日月幽則有鬼神在人爲  
君臣父子之懿遇治世而發之則爲大業偉績使  
萬物得其所遇亂世而發之則利害不能動其心  
威武不能奪其志守節秉義抗大亂而不懼曩者  
廢王日殺不辜疏棄親戚王子以幼穉爲忌見殺  
於是羣臣皆重足而立側目而視懼禍之及已而



莫之敢言先生曰禮君子事君有犯無隱諫以得  
罪當以大逆論死大臣救之囚之海島三千里羈  
愁窮辱十年不挫其所守既以直道光顯矣丙子  
之亂國家淪喪顛覆將舉國爲臣虜先生慨然曰  
一不可背義而圖存當斬佞臣以徇京中君守禮義  
爲國死杜稷旣三諫書言卒不可用事且無可爲  
拔佩刀自刎猶生則逃隱溪山歿而不悔嗚呼其  
義明其志潔其行廉真可謂得聖人之清所立殆  
與日月爭光矣信乎有至大至剛之氣寓於無形  
塞乎無垠在人爲君臣父子之懿見於亂世者如



此然心竊悲松栢後凋無益於歲寒忠臣盡節無  
益於世亂徒足悲也徒足悲也

五言又

姜大遂

惟我先生天與純剛人推遺直元氣我東砥柱頽  
俗十年炎瘴萬古綱常昌辰報効所養逾章爭光  
日月辭罔或異轟炳耳目余不敢贅論執典禮非  
識則未誰能不學行輒素位歲在嗟賢悲纏姜哲  
吾黨疇依後學何述九原難作再暮奄迫德山崔  
巍典刑如昨念余無狀昔者同病奉以周旋山高  
行景世故推遷一哭尚遲負負幽明顏有忸怩今



來奠酹情不後人尚歆歡我不昧維神

又

李 筭

嗚呼哀哉先生稟純剛正直之氣而生乎叔季之下以扶綱常正倫紀爲己任方其昏亂之朝綱常倒植倫紀滅絕上下危懼大小囁嚅無一人特立而敢言者獨我先生威武臨乎上而不變其操鉞鉞當其前而不動其心前後白簡凜如秋霜堂堂正直之氣烈烈奮發之詞直與日月爭其光而忠言逆耳反以爲讐十載海島千里君門雖在竄逐之中而愛君憂國之誠曷嘗小弛于先生之懷也



耶言雖未施於一世而萬古綱常賴而不墜一脉  
倫紀絕而復續者皆是先生之力也其有補於風  
教者可勝言哉至於晚年事業益爲彪炳輝映青  
史聳動中華如先生忠節求之古人亦難多得真  
所謂間世之人豪洪流之砥柱也如生謫劣早荷  
知許晚更連家情義益隆雖不能源源而相從區  
區景仰之忱有同星斗于天豈意今日遽失依歸  
自先生逝吾道益孤邦國日瘁爲私慟爲公哭不  
禁有淚沾臆也老病在床與死爲鄰一盃永設尚  
代人手祭與不祭余慟尤劇不昧者存庶幾來格



又

曹挺立

嗚呼哀哉公之行如青天白日昭乎明賢愚皆見  
而奴隸亦覩公之節如泰山喬嶽萃乎高人世幾  
變而青未了公之言懇切似宣公嚴正似西山激  
烈似澹菴要皆出於天理人倫之正不爲世人危  
張文飾以自標榜於餘子公之筆如朱雲之劒子  
卿之節實爲吾東方三百年正氣之所聚其立朝  
也垂紳正笏有不可動之威其事君也盡忠補過  
有不可撓之志其處難之勇則白刃可蹈其信道  
之篤則千鈞可移其持身也孝於親悌於兄侃侃



於朋友恂恂於鄉黨及其臨事也迴波瀾沮金石  
雖謗興毀來而不悔其所爲養之烈烈兮純乎潔  
也發之仡仡兮確乎堅也剛大之氣有以配義與  
道而無餒弘毅之質有以任重致遠而無虞信乎  
夫子所謂殺身成仁之志士曾子所謂託孤寄命  
臨大節不可奪之君子孟子所謂富貴不能淫貧  
賤不能移威武不能屈之大丈夫君德賴以輔而  
朝綱賴以尊史氏以爲名臣而學者以爲斗極身  
兼達尊而不以爲重德備羣行而不以爲足昭昭  
乎如祥麟出世駭俗眼於一顧飄飄乎若威鳳高



舉覽四海而何適積者厚而施不遐身雖否而道  
則亨立人紀於既斁正人心於既晦由公以後於  
千萬年人得以爲人者公之力也則一存一亡豈  
不有繫於斯世之重輕嗚呼已乎死而死者公之  
身而死不死者公之心質神明貫日月照百世而  
奚疑嗚呼曾有君子始知葛川林先生之模範漢  
多節士豈非山海曹先生之緒餘况復家風世德  
之有自來斯亦得之於禮義詩書嗚呼已乎不佞  
知公于始識公于終以臭味之或近而從遊於義  
分相與之地者四十年于茲嗚呼已乎昔公之病



吾猶執手而問公之歿吾猶撫棺而哭吾不負公  
之庶幾今日之葬公也吾不它事送公也吾不臨  
穴圉圉一官愧古人以忸怩薄寫情而替奠黯身  
留而神馳凡今之人孰知我悲

又

朴和衢

事有人力之可爲猶不可期況於天理之冥冥夫  
豈可得而推嗚呼先生生有聞於當世死有傳於  
後時苟能如此足矣亦又何悲嗚呼先生器度之  
峻整識量之深遠輔以學術之精微故其充於道  
德見於論議森然謹嚴人不敢涯際之窺望之如



山嶽之崔嵬察之如江河之浩汗爛爛如日星之光輝嗚呼自先生仕宦餘三十年上下往復感世路之嶮崎雖遭迍邐遷謫困躓而終不可掩者以公議之是非既壓而復起遂顯于時正大剛毅之節自少至老終始無虧方其天地翻覆國事已去之後使夷狄亦知臨亂之日猶有不欺之臣而以身任百年之倫葬其庶乎烈魄英魂不隨異物遊散而長在乎西山之上東海之濱惟彼讒巧險設之輩隨時俯仰詬誣百車固先生之所嗤而有識之人所痛骨而惡聞知此天下之士無賢不肖



識與不識而皆爲之流涕而噓唏而況平昔追陪  
仍世受知又兼師資所嚮仰而瞻倚嗚呼盛衰生  
死之理自古如此而臨風想望沒世不忘者念先  
生之不可復覩而其誰與歸

又

黃斗興

惟先生之歿上自卿大夫下及蚩氓蠢夫莫不咨  
嗟歎息曰貞忠大節世不復有如鄭先生者今茲  
焉歿矣邦國誰依士林誰恃君子誰仰止小人誰  
忌憚嗟哉已矣嗟哉已矣抑予小子其諸異乎人  
之痛而亦不暇於斯焉念昔小子在湖之西實自

甫韶齋而聞先生之風矣以爲安得一見其人以  
洩予懷此心瑩然蓋無日而不往來也粵在戊寅  
何幸寄贅仙鄉得以姓名一通於門下乃辱不鄙  
進之床下而飲食之又因而教之曰吾子勉之道  
在斯矣惟時小子實荷大惠恍若襲芝蘭而佩衡  
杜庶幾可以補其過弭其愆亦意繼此而益承大  
君子道德之餘緒心焉有得不啻獲大呂九鼎而  
載而歸也但其時先生方病在堂風神氣華已多  
衰耗未周一歲遽爾不淑乃使我只一見而不得  
再也哀彼蒼天何奪之速小子不覺失聲而長號



呼天而痛哭固不暇悲邦國而吊士林慶羣小而傷善類也嗚呼痛哉顧予小子將安仰而安適猶記昔日床下之言尚爾琅琅乎在耳其亦奉以周旋無敢墜焉庶幾不負吾先生之心也伏惟 英靈陟降上下尚或有以聽之

又

鄭弘緒

嗚呼慟哉先生稟山嶽磅礴之氣遵家庭詩禮之訓剛方正直之性賦於天者既厚矣堅確不移之操得於已者又優焉唯其體段惇大顛撲不落故自幼至老在彼人敬之在此人重之屹屹然爲顏

波之砥柱士林之根柢可以梁百尺之觀可以航  
千仞之淵至於做學攻文之際孜孜無怠進進不  
已以就其泓涵宏博之詞翰者迹其遠大之志不  
徒以庋科立揚爲務而汲汲以幼學壯行爲期故  
其立朝也以趨時附勢爲人間之羞耻以引君當  
道爲身上之責任洎乎天地否隔綱常斁絕向之  
貪功盜名憑杜媚竈以招一國之權柄取一時之  
撫仕者莫不畏首畏尾低眉含喙淪胥以入於夷  
獸鬼魅之域而不自知方且自以爲得計于斯時  
也挺然抗疏直批逆鱗雷霆在上而無所變鈇鉞



在前而無所懼危言讜論開卷讀之至今凜凜猶  
吹霜雪使人髮豎膚粟而不敢迫視者蓋公獨也  
然則十年窮海之囚乃公之素定而外有以扶植  
民彝內有以充養所守則公所當爲者豈止於此  
乎將以補明主而裨新化使袞職罔愆鵷班肅  
穆以鑄馨香之臣治者皆自履險堅熟中出來而  
淮陽之卧分陝之寄違補闕拾遺之願薇垣之長  
栢府之都有一曝十寒之歎以至知申之斲八旋  
出天官之纔踐亞席未足以慰都人加額之望而  
遭世罔極一木支厦未吞腦而遂志終掛冠而行

遯天耶人耶抑何理歟盖公之大節至是再彰於  
宇宙則天之玉成我公者可知而棲丘寂寞之濱  
抱疴危綴之中愛君憂國至誠惻怛之意神明可  
質辰已告凶哲人其萎存順歿寧在公何恨而謇  
謇謬謬之昌言不可得而復聞矣如珪如璧之正  
色不可得而復見矣邦國殄瘁誰其活之士趨頗  
僻誰其正之赤子殿屎誰其庇之溪山大澤陰慝  
交作鱷鱔狐狸東西墮突之怪若何而消伏乎嗚  
呼慟哉悠悠海內降衷同得者聞公之喪孰不巷  
哭相吊而顧我私恫倍有萬焉以居則無異鄉閭



以戚則分派非遠以年則長我二歲泥塗托契爲  
日盖久雲路先登得御且屢嚴憚切磋之益若飲  
程醪惠好顏色之假叨逢鄭驛欽仰德宇幾潛消  
其鄙吝發舒故情時或難以善謔病裏把筆旣賁  
先子之碣山中覃思又許文獻之碑感均明幽拜  
賜靡極相距數舍豈難源源而跂履不足自詒乖  
闕去歲之冬聞公邁疾今年春暮始候湯藥執手  
長嗟言微意重渥丹容采雖減什九星眸精力尚  
覺無人謂愷悌之神扶胡竟嗇乎天佑雖然公之  
精靈上昇則騎箕尾扶風霆下降則爲江河作喬

嶽沒不與數窮而化者淪沒而無徵也吾又何悲  
嗚呼慟哉數行殘墨諄複未設書留壁間人已泉  
下白首斯世孤蹤如客八耳觸目酸骨傷心南面  
之樂羨公先得亂離瘼矣憐我猶視嗚呼慟哉靈  
辰不留柳車將發九原載邇百身莫贖隻鷄漬綿  
寸誠攸寓不昧者存庶幾右止

又

侍教生宋翊

嗚呼大賢之生蓋亦不數儲精日星孕靈河嶽厥  
惟孔艱是以殊邈嗚呼先生曠世一出純剛之氣  
正直之質有充其容有確其守富貴貧賤不易其



操死生榮辱惟義與比粵在昏朝綱常墜地逢迎  
好爵敢言斧鑕人倫誰恤天理已滅是時先生奮  
然獨立抗疏天門言甚切直十年瘴海鬢髮盡白  
可困者身難奪者節 聖明撥亂天日重明新政  
之初首起先生都俞一堂魚水相得遇災盡言隨  
事納約瀝血披肝幾輸丹誠邦運不幸歲值丙丁  
一髮孤城 天步艱難廟堂得策 宗社再安先  
生守正義不見屈腹劒不死正氣愈烈退歸田墅  
謝絕人間萬墨雲山一室安閒大明天地崇禎日  
月今其已矣節義誰托朝家無祿士林靡依徒友

紛集窀穸告期新阡已卜古馱風悲嗚呼先生無  
復來思一杯痛哭萬古長辭

又

侍教生林真忬

嗚呼先生之生夫豈偶爾稟天地純剛之德鍾河  
嶽清淑之精弱不好弄志專文學蓋其緒餘父子  
之道君臣之義夙耳聞於家庭付畀責重豈不欲  
扶顛持危道由我立亦安能枉已徇人身任綱常  
去國之孤舟出沒手擎天日嬰城之義膽輪困悵  
餘生之何歸有猿山之西阿破床弊席僅容膝柴  
扉長掩雲沉月落萬籟寂山鬼護呵燒香靜坐收



拾五十年精神披卷精思領略三千載脉絡邦家  
倚以爲重有虎豹在山之勢儒林忽焉不幸奈恭  
華其頽之亟鸞鳳之姿金玉之相霜月之襟今不  
得以再覲松柏之操正直之氣光明之詞世孰能  
其彷彿忠孝大節與日月爭光兒童誦于口太史  
書諸冊是所謂不朽者存孰不曰死而不死鄉失  
著龜邦喪元老公私之慟曷有窮已嗚呼哀哉旣  
同鄉而同錢又同業而同志陪杖屨而襲蘭蕙四  
十年之情義空山此日獨立而長懷撫平生而沾  
臆物雖薄而誠勤覬英靈之來格

又門人鄭絢鄭約鄭承業鄭昌慶鄭崑端權得平

天挺吾東間世人物居家孝友事君忠節斯文宗  
匠國家柱石心耻帝綦誓復皇明斷斷一心皎  
如日星博愛門族提撕後學天耶命耶門祚衰薄  
吾黨小子嗚呼安適盈在者誠薦此菲薄

又

門人鄭縝

嗚呼哀哉受天地純剛之正氣以直養而配義與  
道稟四時中和之粹德以學問而窮理至善平生  
事業已成幼年居家則媣色婉容而孝於親和樂  
且湛而敬兄友弟先府君先生病劇拜跪祝天請



以身代母夫人疾甚嘗矢甜苦凡祭祀之時必齋  
戒沐浴以盡如在之誠居處恭言忠信行篤敬誠  
正修齊之道自然成就而以至事君則移孝爲忠  
引君當道犯而不欺扶植綱常以叙彝倫十年海  
島一髮孤城忠義動天節義感人白刃可蹈千仞  
可移殺身成仁不可奪之節凜凜乎疏劄中處鄉  
則恂恂於鄉少侃侃於朋友無失於貴賤不動於  
貧富博愛親族散財必賑聞人有喪匍匐必救此  
無非信道之篤而特一事可略之何敢形容其盛  
德也天不喪文吾道其東濂洛程朱之學先生學

之寒蠹晦退之業先生業之立人紀正人心於旣  
斁之日國人重之士林仰之崇德象賢而爲百世  
師儒同俎豆於先正之列不顯其光於萬斯年余  
自髫鬻受業於先生先生以兄弟之分義待之余  
則猶以師生之分義尊之不離於門庭之下而悅  
而不學者不知其幾十年矣國有喪亂之後先生  
退藏某里心耻帝昶志切尊周一區某里崇禎日  
月柴扉長掩案上朱書謝絕人間俗士猶稀余拜  
床下則掩卷笑談終日而退天何不憖泰山其頽  
邦國殄瘁吾徒疇依天理難堪草木增悲永隔儀



形已至再暮今扶病骸奠此一杯洋洋者魂陟降者靈其庶幾右之

又

門人尹溪林  
汝梅鄭岐鳳

嗚呼惟我先生稟三光之全鍾五嶽之粹夷清而惠和玉潤而金精居家孝友在朝盡忠一斗閭闔振萬古之綱常而是非訛誤路千里之滄溟則先生之忠孝聳動乎當時之聾瞽而先生之節義明炳乎百代之天地矣南漢事誤主辱極矣玉貌城中慷慨不已審取捨於熊魚期孔孟之仁義規死如歸伏劒自凌天地鬼神竟所扶持而四創之忠

言正論能動 聖主之心死權奸之膽則朱雲折  
檻風斯下矣胡銓一封無或過之均來于鄉憂國  
之心愛君之誠未嘗一日忘于懷而時移事易志  
切蹈海考槃在澗誅茅於某里之洞守尼父遯世  
死悶之誨則其視世上慕利祿者豈特衆茅之於  
梅秀羣雞之於鶴立乎噫先生存歿國以輕重而  
彼蒼難謀萬丈之光焰倏以乘箕泰山之顛悲纏  
遐邇柱石之摧痛徹宸極豈邦國之殄瘁抑士  
林之長慟等以畫虎之資雕虫之技認被千金之  
顧幸窺數仞之墻旣哲萎而樑摧將安依而安倣



宇宙寥寥脩夜沉沉今者靈輅既駕丹旌啓途痛  
明幽之永隔秉紼翼而長吁塵埋講席無復捫衣  
而受業江干奠爵不知隕涕之盈襟

又

尹思勛

嗚呼天柱已折吾何寄附日月雖晦一氣萬古嗚  
呼慟哭天地歲暮

又

曹挺生

嗚呼哀哉山高德裕水清猿鶴鍾生夫子地靈之  
傑正氣亘天大節貫日抗章昏朝倫紀賴全矢死  
孤城忠義動天天下之士杜稷之臣天耶命耶生

之不辰德不盡布志不大伸回首乾坤滿目腥塵  
草舍溪山大明日月天未欲治何奪之速邦國殄  
瘁二鼓滅絕而今而後吾其披髮生也無狀早荷  
知遇出入函文義重師友頃在京洛函訃遠傳身  
縻遊宦吊不人先今也南歸一坏新阡祇有大名  
宇宙綱常舉世衣冠奔走瀋陽公獨全歸夫我何  
傷光陰遄邁倏爾初祥辭不盡情有淚滂滂

又

門人鄭時修

前以五十六字詩哭之復以五百餘言文哭之而  
學文之卓有高見孝悌之質于神明者將以待別



科不言粗述立朝大節平生所景仰而起慕者以  
告于先生之靈曰鄒聖說氣而惟曰配義與道晦  
老論陽而亦惟曰必剛必明所以直養無害則至  
大至剛塞乎天地之間而自然之理終不假安排  
勉強之力矣然則逢干之直節伯夷之叩馬魯連  
之蹈海澹庵之封疏雖有純駁分數之不同均乎  
剛明之質道義之發也先生見世也晚四十後始  
立于朝若遇賢明之主清平之世則不過爲奇  
氣疏節恢廓倜儻之人而同歸於汲黯唐介之流  
而已而止則其能上下於二三子之列擔當三百

年綱常乎嗚呼君暗於上所以有甲寅之封事華  
淪於夷所以有丙子之仗義其餘倫紀之所扶植  
彝常之所論辨義形于色終始不渝者亦無非遭  
時之不淑而不得已見於奮發感慨之間刀鉅鼎  
鑊有所不避出萬死之計犯人主之怒者亦豈先  
生之所期乎然而蹈而復奮死而不悔者是固天  
分之自得而吾東方數千里山河一種剛大之氣  
獨鍾於先生者可知已惟其平日不詭隨不苟合  
光明公正堂堂磊落無一毫纖芥可疑者故利害  
禍福無足以撓其心而生死路頭已有一定之見



不撓不沮力量如許其大也於乎人孰不讀聖賢  
書以古人自期一出而失本步狼狽而歸焉者多  
矣公今獨全其所性人或有善初而不能善終者  
公今處大變臨大難凜凜大義如秋霜烈日卓卓  
而較著勿欺犯三字符果是平生之大節俯仰無  
忤之一語真所謂究竟法也公今與化俱盡與形  
俱逝而吾猶彷彿見公之騎鳳馭氣鞭雷霆叱星  
辰遨遊乎首陽之巔出入於東海之濱矣烈烈壯  
氣長使吾東方之人物激仰於千萬億乎噫日月  
經天光彩常鮮下臨萬國北辰懸中央則願先生

陟降而左右之夏不瞽萬萬古

又

門生朴 炅

嗚呼天以綱常全付先生自任者重直道而行君  
臣父子大倫大經不墜于癸焉熄于丁鵠立兩朝  
前後一節轟天烈雷長夜日月遐邇瞻仰士林矜  
式竭力致身雖未吾必況我先生終始典學入胡  
罔極是非間起何傷雪日吠者犬耳昔我先君彌  
先生曰貞忠大節我朝之一小子何知祇奉庭誨  
披霧清關歲在乙亥自是厥後累承警咳大徃之  
後夏謁門軒問我嚴侍寒暑而言各抱疾病久未



源源相思不忘衰世心事未死更見辭意懇至歸  
告庭闈則將往候德星未聚天道寧究風雨孤山  
枯魚啣素木稼德裕先生繼歿言猶在耳五內如  
割哀疚在躬尚違一哭今始奠酌情豈不足德山  
義義先生之節德水洋洋先生之風不亾者存曷  
云長終單杯一慟萬古心情庶幾格思鑒此微誠

又

蔣文益

伏以凡天下吊者不一其義或以親戚之恩或以  
交契之情此吊之常也亦有異世而相吊者蓋惜  
其入之道義吊其入之道義也則雖非親戚之恩

交契之情亦可吊也異世而相吊況生并一世乎  
此小子之所以吊也遂詞以哀之曰惟我先生挺  
此南紀特立宇宙獨行其志扶植彝倫踐履高義  
白日揭天清風振地著龜一代師表千祀猗歟  
譽流湓遐邇小子慕義涉三百里一杯敬奠庶格  
誠意

又

門生金益  
堅全尚儉

嗚呼哀哉日光玉潔海涵山立絕學梯航邦家柱  
石身兼三達足躡五福大業未究濛汜何極嗚呼  
哀哉剛方正大稟於陽德篤學實踐出自庭則忠



誠職事孝友天得胡付之罪而以時躡嗚呼哀哉  
朱雲之劒北海之節一筆綱常萬古日月由我者  
吾不我者天斯言一出內若焚煎嗚呼哀哉德山  
巖巖德水灘灘庶幾仰止天不憖遺人之無祿吾  
道亦熄日月韜光天地改色嗚呼哀哉 聖上震  
悼哀我直臣忸官臨哭贈奠禮殷良史維傳大筆  
維刻四方維吊況余來學嗚呼哀哉少不如人登  
門奉經恩波函文涵泳周星故事盡在清風颯爾  
瞻容莫及報德何地嗚呼哀哉九原誰作窀穸告  
期山哀樹思雲愴風悲拊膺長慟長慟如何伊奠

之非而誠孔邦

又

趙重呂

天迄于崩而柱獨存中流而屹弗汨以奔猶撐於  
癸肯隨于丙不貳而一惟素之秉生既非欲死奚  
以戚彘揭於斃網以之植純剛至大繫氣之塞天  
下一人亘古特立不空其言亶施乎事維士之式  
盍院而祀所貴乎學匪斯而何在公自如何損何  
加日月之臨鬼神之質奚言之多大呼而哭

又

門生鄭必達

嗚呼天地之間有一氣焉上焉為三光下焉為獄



瀆散而爲物也爲金玉爲圭璧爲麟鳳龜龍松桂  
枏梓是氣也行乎世則爲休明不行則爲衰否行  
則爲諸夏爲人不行則爲夷狄爲禽獸雖然從古  
迄今宇宙不知幾變而所謂是氣者疑若與之俱  
變而於其際也天必篤生一瑰偉命世之人把握  
扶持是氣於不變之地使人不至於禽獸諸夏不  
至於夷狄上之人猶有所恃賴憑依以爲之國求  
之於古若北海西山東國燕臺之流皆其人也茲  
我小中華正氣之行三百年于今矣而若我先生  
者所謂把握扶持是氣之人非耶洪惟先生受是

氣於天備是氣於身踐履於平昔者皆是氣之發  
發揮於事業者皆是氣之充其立朝之節歷敷之  
詳有非小子後生所可殫見而形容之備矣若其  
儉德自持而爵祿不能屈忠言無諱而威武不能  
奪垂紳正笏而金華栢署宗主之有屬虎伏龍蟠  
而章甫縫掖瞻仰之攸歸及夫明大義於我所當  
爲之時樹大節於人不敢爲之地使君臣父子之  
大倫天之經地之義而所謂民彝者揭然大懸於  
世義夫節婦有所標表而益堅賊子亂臣有所觀  
望而羞愧嗚呼雷霆猶有伏烈乎先生之氣終不



可遏山嶽猶有隕烈乎先生之氣終不可挫昌黎  
所謂特立獨行千萬世一人之人在先生素爲有  
餘而曾子所謂托孤寄命臨大節不可奪之君子  
亦可謂全盡而無憾矣雖然此特我先生平生期  
待之餘見於行事者之彰明較著人可得聞者也  
此何足以盡先生之大哉先生天品直方辦局宏  
大神彩磊落志意慷慨視世之屑屑者不啻若涕  
唾脩然獨與道行卓然獨與義立千句氣力萬丈  
光焰足以聳動風節扶植宇宙而及其養深積盛  
愈出無窮流轉日用之間無非靜虛動直之妙人

之視之但見其蘄然不可幾及而已若槩其實行之有於身者則其居家也事親止於孝兄弟止於愛祭祀止於敬其與人也暄然冬日之溫其臨事也厲然春雷之發其健義也洪濶赴壑而不可禦其彈惡也一劍斷蛇而不可續其應學也直捷諸懷而加之以不倦其吐辭也直出於已而凜然有誥體蓋其所稟於天者至大至正之氣是其剛健純粹篤實光輝者固已前定不窮而其於進德修業亦無俟於勉強矣何其偉哉嗚呼世之知先生者既鮮而其自謂知之者不過曰一介忠節之士



而已卒之落落者不能合峽峽者不能全大則大  
而狼狽小則小而狼狽麤拳大踢到底無着手處  
使環海蒼生不被我先生之澤者天乎人乎世道  
不幸歟嗚呼先生萬事已矣尚何爲哉止乎行乎  
變乎已乎蕩而爲昭昭乎融而爲渟峙乎泄而爲  
神寶瑰奇乎將復爲君子以見世之休明乎不然  
是茫茫者終不可信乎生先生之後者將不夏而  
夷乎不人而獸乎嗚呼藐我小生旣慟爲斯世復  
慟爲斯文捐百身之思傾東海之淚有不足以盡  
者故遂不暇及吾私

又

朴震耆

嘗聞韓子之言曰士之特立獨行適於義而已不顧人之是非皆豪傑之士信道篤而自知明者也人之處於世信乎其至難苟非豪傑之士信道篤而自知明則何能特立而不倚於俗獨行而不混於衆乎先生以天挺英豪之資稟純剛至正之氣才超乎古人行出乎當世以言其操節則秋霜也烈日也以言其襟懷則皓月也清冰也一毫塵世之念未嘗萌于腦中而其所佩服於身上者惟茲義理之訓明於性分之內審於取舍之機謂忠孝



本無二致而盡生三事一之道知熊魚不可得兼而有白刃可蹈之志此乃先生節行之大略其德業之發於施爲者鬼乎燠乎有不可得以言語形容者矣固非後生末學所能窺測其萬一而姑就其青天於奴隸白日於宇宙者而言之則在先生筮仕之初國運之中否極矣君子之道消甚矣揚揚於內庭外衢者無非滅義之人聒聒乎彼唱此和者盡是敗常之議彝倫將斃三綱幾墜舉一世淪於禽獸之域而人莫敢救正先生獨持風裁鵠立朝端以格君心熄邪說爲已憂扶綱常立人紀

爲已任作砥柱於奔波之中而回旣倒之狂瀾鳴  
孤鳳於高岡之上而驚滿林之昏鴉使我一國之  
人爲父子者定此則先生之特立獨行而不顧者  
也及其遭逢 聖明際會風雲懷伊尹不能堯舜  
之耻而致王臣匪躬之節效孟子不敢以陳之義  
而盡納約自牖之誠展布所學不負初心而凜凜  
貞操實表歲寒之日烈烈貞忠彌著板蕩之際此  
則先生之信道篤而自知明者也先生既有此內  
美又有此姱節以余觀於先生豈但爲吾東方未  
有之人豪哉試以古人之所嘗論說者而擬之則



子曾子所謂可以托六尺之孤可以寄百里之命  
臨大節而不可奪者豈非先生之謂也耶先生生  
於隆慶己巳歿於崇禎辛巳先生之生於世七十  
有三年人之待先生以柱石之位者莫不悶其衰  
恨其違而神明扶護幸得全於危難之間或者皇  
天其亦有意於斯世又莫不冀其復出股肱乎

聖上耳目乎斯民挽回世道復我邦家歲會龍蛇  
樑木斯摧豈意邦國之不韋生民之無祿而終不  
能保我先生哉嗚呼先生之在世也國有人士有  
師而其有功於名教大矣今其已矣哀職之有

闕其孰能補之風教之不淑其孰能正之將見綱  
紀頽弛而大義淪人心貿貿而天理滅矣其於爲  
時之忱誠不禁其悲痛而以至堂堂之論落落之  
標終不得更接於此生其爲爲私之哭又何可以  
紀極也哉嗚呼日月流邁再暮已迫來拜喬封宿  
草心驚單杯薄奠豈盡哀慕之情詞以爲侑以冀  
降臨而已

又

門人全時  
賜時叙

嗚呼善化天下者止於盡天下之道而已善化一  
國者止於盡一國之道而已國有君臣先生君臣



之國有父子先生父子之則先生其真盡一國之道乎嗚呼善養天地之氣者止於盡天地之氣而已善養吾身之氣者止於盡吾身之氣而已天地有是氣先生得之於身而無虧欠則先生其真盡天地之氣乎嗚呼有是氣有是道者前千古後千載雖或有及於先生者而亦莫有過於先生者則先生存歿有關乎時之盛衰國之隆替也豈可以吾一鄉區區之私爲先生慟也嗚呼純粹心得者先生之德也先行後從者先生之言也而有若無實若虛惟務爲己之學不爲求知之行故人莫得

窺其涯岸而取學於已徒知先生之德行之兼備而不知所以德行也徒知先生之語默之爲教而不知所以語默也然則出入乎先生之門者空乎不得先生之學而終爲一鄉人而已也嗚呼民其溺矣果誰援乎山其頽矣復安仰乎先生之處鄉也無大無小待之惟旬而皆得其歡心則先生之歸終也豈不倦倦乎吾一鄉人而鑑此微誠也聊備薄具冀我先生之一歆靈其不昧庶幾來格

又

侍教生李惟銓

嗚呼哀哉惟我先生間世人英純剛其氣金玉其



精惟忠惟孝本乎天性曰仁曰義學我先聖忘身  
殉國見危致命歲寒之節疾風之勁堂堂大義棟  
樑宇宙凜凜貞忠日月今古謂天假年以濟斯時  
邦知一夕諫星遽墜立紀扶綱更有何人茫茫此  
世吾道其湮昔我先君早托金蘭追隨當日吐心  
披肝肆余小子久仰德儀夤緣獲拜十年于茲期  
以生平永侍函丈今其已矣余將安倣單辭薄奠  
詎盡深情惟冀尊靈降鑑微誠

又

曹時亮

嗚呼昭乎天日星列峙乎地山嶽萃盈兩間此一

氣壯本朝君子以一封奏西山直二者擇東海節  
遯求志窮見義文在茲道不墜天欲喪木稼怕生  
天下死天下乘箕尾朝列聖就窀穸目不瞑單  
杯斟如平生靈不昧尚歆誠

又

門生尹衡聖

嗚呼哀哉天之將喪斯文耶吾先生胡然至於斯  
也天地間純剛至正之氣於是焉傾摧頽折舉一  
世泯泯焚焚將不免爲獸爲禽則先生之亡曷爲  
而不使我失聲長號也嗚呼太史氏大書特書褒  
揚大君子事業垂耀千百載流傳則固無容小子



贅說而世之論先生者咸曰直節噫直節之外夫  
豈有別件底道先生所着力惟在夫真實恁地而  
踐履篤行又以孝悌忠信爲本則夫孰知先生直  
節從這裏流出也天若相我斯文不使吾先生坎  
壈而發揮師門展盡理義上工夫則造詣之醇契  
悟之深其可量也惜乎時不遇才不彰未有以大  
闡只以直節鳴也雖然先生事業奚獨直節以一  
身而撐柱我東方三百載綱常孤忠正氣森嚴與  
秋霜烈日爭光而所守者確所執者毅招之不來  
麾之不去雖自謂賁育亦不能奪之偉哉先生其



有杜稷臣之風而措之圃隱可與之上下磨光也  
嗚呼資稟甚高充養有道少受學於家庭慕道希  
賢每想古人風節慨然有激揚之志應舉登朝砥  
礪名節危言正色直欲以隻手正人紀扶世道而  
復遭時齟齬忠君愛國之心白首不渝鶚立朝端  
遇事敢言晚節退居憂世之念蓋未嘗小挫而每  
念王室自然流涕忠誠惻怛出於天性而然也若  
乃胸懷坦夷洞徹無間飲人以德因覺其醉陶然  
自適人莫窺其涯涘極其德美有不可以言語形  
容雖若放曠不事修飾爲者而然其自律也甚嚴



恩篤於兄弟化行於鄉黨雖小人趨向之異者不敢不稱先生以君子人也至於孝友絕人而勉勵如不及恬澹寡慾而持守不自懈盡言納忠而不爲訐秉義飭躬而不爲介是則古之人尚或難能而吾先生未肯以自大也蓋有得於庭訓者深而學力之克完者有以使然而亦非有以強之也嗚呼已矣貞忠大節卓行高範尚安得復見吾先生也臯比一撤舊廬無人寒溪冷日故跡荒涼流風餘韻聳動興起至使過客遊士俛仰荒山皆有懦立頑廉之志則立立峯巒宜與金烏高標百代交

暎嗚呼至哉小子南來出入門下今五載矣不我  
外視嘗蒙一言獎許春堂秋夜時陪杖屨勉勵警  
策恩猶子侄其於持身之道涉世之方頗荷誨諭  
之諄諄嗚呼哀哉靈辰不淹大葬有期佳城一閉  
明幽永隔彷彿警咳猶在夢寐一杯薦誠情溢淚  
漲長號抑塞天地茫茫不識先生其克記我舊日  
門生也耶嗚呼哀哉昔誦離騷舉吾先生之觴今  
今奉薄具酌吾先生之堂今奚獨哭吾之私蓋以  
爲天下傷今嗚呼先生倘肯來享我椒漿兮

又

沈日三



嗚呼哀哉純剛一氣磅礴萬古先生受之壁立東  
土器局洪毅海濶嶽屹腦襟洞澈冰清玉潔更加  
磋切詩禮家庭良玉露質虬光發硯奄爲人宗北  
斗聲名褒善一命九天恩澤俄登金榜鵠立鵷列  
五嶽可動一心難屈昏朝正論秋霜烈日危城抗  
章春秋鈇鉞年老力弱手板焉用已矣時事鐵馬  
縱橫回首人間空拳長吁一劍餘生何黨之乎瞻  
彼德裕山色不異爰得我所知止而止翠松庭畔  
天月獨皎年號止斯異曆忍披花開葉落只驗時  
移東窓雲暗北嶽霜潔山中乾坤大明日月天寒

風意獨倚脩竹明時國士清世全人照世明鏡行  
俟良辰憂時一疾遽至易簣斯文疇依吾道何托  
嗚呼哀哉先生雖逝道豈墜地堂堂直氣聳動瞻  
視洪賢斧鑕素心愈厲金相龍灣高義彌篤昭揭  
人倫凜凜雪日萬里松山士龍立節一葉秋風昇  
明遠跡蚩蚩者岷有如忠赤是孰使之先生之力  
世何罔極加以不遜訾謗牙頰怒濤驚噴其在先  
生有何加損顧余無狀早逢祚薄疾病纏綿長在  
醫藥徒勤景仰末由拜床幸得一奉无悶之堂剛  
明之質正大之器粲然之言粹然之儀以予觀之



天下一人將擬執贄願承清塵今也則亡痛矣無  
及遲遲一哭再期已迫宿草今日悲愧交作是歸  
誠薄曷云慕切龍門之下江水晶晶列于前賢永  
垂厥聲謹具菲薄敢告微忱不昧惟神尚祈鑑臨

又

門下生朴鳴震

嗚呼慟哉無極之真二五之精化生萬物而萬物  
生生生生之中惟人也最得其靈最靈之中惟能  
集義而養氣者能不以死生窮達易其心而真可  
謂大丈夫矣盖有是義斯有是氣有是氣斯其不  
為利疚不為威惕若然者不懼於刀鋸鉞鉞鼎鑊

之嚴不屈於王公之貴晉楚之富貴育之勇信乎  
孟子之言曰以直養而無害則塞乎天地之間而  
曾子之言曰自反而縮雖千萬人吾往者矣昔者  
龍逢戮比干剖鄂侯脯夷齊餓於首陽文山死於  
燕獄凡此數子者豈不知好生惡死而樂就其脯  
剖與餓死哉惟能集義養氣而不奪於脯剖餓死  
者矣先生生丁不辰運值百六 國祚否矣王室  
燬矣頃者恩夷母子同氣相煎三綱五常之道於  
是乎斃而先生奮不顧身忠犯主怒抗義封章昭  
揭日星及夫白登久暈邦夷師僭禮樂文物之盛




於是乎淪而先生捐軀就義視死如歸衣帶一贊  
聳動華夷此皆先生集義養氣之力有以致之而  
當是時也微先生一人則三百六十州東方盖寂  
然矣嗚呼慟哉狂瀾隻手大厦一木欲扶綱常而  
不能扶於前欲植倫紀而不能植於後置此世於  
不可爲之地而莫之能拯救其萬一則天之降先  
生果何意耶雖然使一世之人知有所謂三綱五  
常之道君臣父子之倫者而雖其不能扶不能植  
不能拯救於一時而將扶將植將拯救於後來則  
天之降先生豈偶然哉噫世之人平居則食君衣



君遇難則忘君戴讐至以斥和開釁咎怨我先生  
吹雪吠日何傷於雪日哉皇天后土實所鑑臨  
國乘來世亦自有能辨之者矣昔我先祖父與先  
生有舊以此夤緣出入蒙幸於門下盖有年所矣  
今先生歿無所庇仰嗚呼曷歸幾不欲生物雖罪  
薄誠實可歆

桐溪先生續集卷之二











二侯集溪桐

七